

sein de la gloire. Ces parents & ses voisines s'affligeans auprès d'elle, sur le trespas de ce petit Ange, elle leur dit, qu'il n'estoit pas temps de pleurer, mais de se rejouir, & qu'elle sentoit vne consolation au fond de son ame, de ce qu'elle auoit vn enfant au Ciel: i'ay demandé, disoit-elle, son baptesme à Iesus son Sauueur & le mien, il me la accordé, n'est-ce pas le sujet d'vne joye & d'vn contentement bien aymable?

Pour conclusion les Peres de cette Mission, qui ne baptisoient les Sauuages es premieres années que dans la necessité, commençâs depuis trois ans à voir vn fruit plus ample de leurs petits trauaux, par la cōuersiō de plusieurs familles de Barbares, qui faisoient publique profession de nostre sainte Foy, & que leur nouvelle Eglise auoit esté depuis trois mois acruë du nombre de quarante Sauuages baptisez solennellement, furent obligez de monter à Kebec pour y conferer avec le Superieur de toutes nos Missions; lequel ayant pris l'estat de cette nouvelle Chrestienté, & le desir ardent qu'auoient plusieurs Sauuages suffisamment instrutis de nos saints Misteres pour receuoir le Baptesme, renuoya